

## Lu Curé d' Cucugnan.

L'abé Martin ére curé d' Cucugnan. Bon coume lu pwin, franc coume l'ör, il inmot ses djans coume in pére.

Il ârot sté l' pu eûreû des oumes, et Cucugnan ârot sté in paradis su tère si les Cucugnanès lî avint fwêt in pô plêji. Mê, i nn' astint bin lon.... !!!

Les aragnêes fiyint leus twayes dins l' confessional ; lu djoû d' Pâke, les ostyes dumèrint dins le fond du cibwâre. Les djans frèkantint pu vite lu cafè ku l'èglîje. Les fames n'arètint nin d' glawiner su l' dos des ôtes ; les oumes travayint l' dimadje, putot k' d' aler a mèsse ; les djon.nes courint drî les hâyes avu les coumères, et dj' a passe !

Les prônes a messe, person.ne nu les choûtot et nosse pôve curé astot bin dusnorté, loû ki priyot l' Bon Diu du n' nin l' lêchî moru duvant k' i n' ûje ramon.né al bédjrite tous ces mâcroyants la d' Cucugnan.

Fât crwâre k' il savot sù s' î prinde avu l' Bon Diu, ca l' dimadje d' après, cand il è monté al chère du vèrité, il avot sa ptite idéye.

Mes frères, dit-i a-z atakant, vous n' alèz putète nin m' crwâre, mê, çu nute-ci, dju m'ê trouvé a l'uch dou Paradis. Sint Pîre m' è vnu ovru a m' dijant :

- Tins, don, vla l' Curé d' Cucugnan ? Cè k' i gn è ki n' va nin ? Vous n' m'ôz nin l'êr dins vost' assiète anute! Nu dmèrèz nin sul soû ! Intrèz dlé mi, dju srans mî a kwète pou câzer.

- Bin, bon Sint Pîre, vous ki tnèz l' grand lîve et la clé, vous m' dirîz bin coubin k' z' ôz d' Cucugnanès ou Paradis ?

- Dju n' pus rin vous rfuser, don, l'Abé, assîzèz- v' ! Dj' î vons wêtî.

Et vla Sint Pîre ki s' mèt' a nanchî dins les ridans après les lunètes. I dovure lu lîve et cmince a l' foyter à malounant: Cucugnan, c' est bin ça don ? Cu... cu... dj' î arivans. La, dj'î sans : Cucugnan !

- Bin, mu pôve curé, z-alèz yèsse décu ! Wêtèz vous minme ; la pådje est toute blanchè. Nin ène âme ! Nin in Cucugnanès.

- Mê, c'est nin possibe, don Sint Pîre ; dju m' doutos bin n' a wêre trouver, mê cand minme, nin iynk, c'est in pô fwârt ! Vous n' trouvèz nin, vous ? Oh, mon Diu, mon Diu, ké maleûr ! Mê, vous v' rindèz compte. Nin iynk, nin yène. Kèsku dj' ê bin polu fwêre ou Bon Diu pou z-èsse aflidjî insi ? Mi k' es leu Curé dpwis kinze ans ! Dju n' a rvins nin, ca dju n' a rvins nin !

Alons! Alons, l'Abé Martin, nu v' foutèz nin la tièsse ou meur pou si pô. Vous n' a plèz rin, don ! Si v' n' a trouvèz pont, cillé, c'est bin chûr k' i sont ou Purgatwâre pou fwêre leu ptite carantin.ne. Moutô k' on les va vèy ariver du d'ci pô.

Mê , grand Sint Pîre, s'i sont ou Purgatwâre, pèrmètèz k' dju les vaje wâr et lzî câzer, pou wêtf d' les rmète su la drète vôle. Vous n' plèz nin mu l' rufuser !

Bin chûr ku non, m' fi, tchâssèz vite ces solés la, ca les tchmins sont mwês, da ! La, c' est bin ! Asteure alèz-z-a pa ç' tchumin ci ; continuwèz tout drèt jusk' ou grand uch a mwin drète. Vous wârez bin, il est plin d' nwâres crwâs pa ttavâ. Vous n'ârez k' a toker. On v-z ovurrè.

Et vou m' la vôle, pa in niche tchumin, in pazê, putot, plin d' ronches et d' chôdriyes, avu partout d'es tayans et d'es mouchètes ki n'arètint nin d' piker, des vipéres ki chouflint s'les costés et des grandes dugnêsses ki m' grètint la figure. Dj'ê tègué, savèz, pou-z ariver ou grand uch a mwin drète, dju n' vous dit k' ça. Et mu vla a bèrdoûchî pou k' on m' ovure.

Kîski toke insi, don ?

C'est mi, l' Curé d' Cucugnan.

Du kwè ?

Du Cucugnan, CU – CU – GNAN . Vous n' counichèz nin ?

Ène minute, ku dj' wête lu botin.

Ou dbout d' in moumint, vla in grand nwâr anje ki s'amon.ne a l'uch et m' fwêt inter ou bûrô. Ene grande clé d' diamant lî pindot al çinture.

Assièz-v' la. Dju nn' ê k' pou ène minute.

Et crac, et crac, voulla ki continuwe a grèter la plume dins s' gros lîve, co bin pus gros ku l' çî d' Sint Pîre. Pîs al fin, i rlûve la tiêsse pou m' dire :

Kèsk'on vint fwêre avâ ci ? On-z est piêrdu ?

Nin ttawêt, bel anje, c'est Sint Pîre ki m' avoye pou sawè si z'ôz des Cucugnanès ou Purgatwâre.

Dès cwè.. k' vous djèz ?

Des Cucugnanès, des djans d' Cucugnan, cwè, dju sus leu curé.

Ah ! l'Abé Martin, si dj' tins bin.

C'est ça, tout jusse !

Et voulla rkèru dins s' grand lîve et foyter les pâjes : Cucugnan, c'est in C û in K.

Bin in C, don !

Adon, dit-i a rpurdant bin sn' alin.ne, dju n' wès nolu avâ la. Pont d' Cucugnanès ou Purgatwâre.

Bin, èyusse k' i sont dabor, s'i n' sont nin avå la ?

Bin, ou Paradis, hin, l' Abé. Eyû k' vous vlèz k' i srint ?

Bin, la k' dj' a dvins !

Et après ?

Bin, i n' î sont nin non pus! Jour du Diu, Maria Dèi, ké afwêre ! Pont la- hyôt, co pont cillé ?  
Mê, adon ?

Gn è pont du rméde, la Curé, c' est k' i sont à l' anfiêr !

Ouye, ouye, ouye, bel anje ? Sinte Crwâs, Jésus, Fils du David ! Coumint est-ce possibe ? Sint  
Pîre nu m' ârot nin dit l' vrêy... ? Siè pourtant, ... dju n' ê nin oyu l' cok tchanter ... Ouye,  
ouye, ouye, coumint k' vous vlèz k' dju vaje ou Paradis si mes Cucugnanès n' î sont nin ?

Choûtèz bin, la, l' Abé, si vous vlèz nn' awè l' kûr nèt', vnèz k' dju v' mousture, purdèz l' pazê  
ku vla et courèz ossi vite ku vous plèz jusk' ou grand uch a mwin gâtche. Et i m' è rclô l'uch  
ou nez.

Lu tchmin k' i m' dijot, c'ére in pazê plin d' roudjes çades ki brûlint les pîds. Co chance d'awè  
les savates du Sint Pîre. Ene tchaleûr la ddins ; dju m' apîtos a tous bouts d' tchamp. Co bèle  
chance ku dj' nê nin bèrouyî. Des tours pou-z èsse grèyî su place ! Dj'avos la tchmîje ki colot,  
les goutes du souweûr mu tumint du front. Dj'ére prêt' a tumer court d' alin.ne cand dj' vu l'uch  
d' à lon. En' uch, ène portriye, putot, on-z ârot dit la gueye d'in four !

Oh ! mes afants, ké spèctake la ddins ! Pont d' rèjisse , savèz, et on n'dumande rin, da . On  
mousse et c' est tout. C'est à lâdje coume ou cabarèt. Dju transpiros et dju tran.nos d' frèd les  
deus assan.ne. Les cate poÿs ku dj' ê co s' la tiêsse su drèssint tout rèdes. Dju sintos la tchâr  
grèyîe, coume cand l'marichâ fère les tchfâs ! Dju n' a plos pus dins ène pufkine parèye. Et  
dj'atindos brêre et tchûler, des ôtes ki djèmichint ; pus lon, des ôtes ki hoûlint, d'en' ôte costé,  
des djèrmints d' dânés. Ké dèsolacion d'in parèy spèctake ! Mon Diu, toudi !

Eh bin, cwè ! tu n' intures nin ? k' i m' dit in diâle ki m' pikot d' sa fon.ne ?

Non, dju n' inture nin la ddins, mi, dju sus in sèrviteur du Diu, sèss' !

In sèrviteur du Diu. Bin ! kèsku t' vins foute avå la , dabôr ? Esplike- tu !

Et mi ki tran.not coume ène foye, dj' avos bin dou må d' rusponde : Bin...bin..., dju ... dju  
vins... dju vins wâr ..., si ... si v' n' ârîz nin ... si v' n'ârîz nin, pa des côps ..., dazâr ..., kékin  
... d' Cucugnan.

Eh bin cwè, vayant, tu dèraye . Tu duvros sawè k' tout Cucugnan est cillé. Tins, lêde cornaye,  
wête coume on lz arandje tes fameûs Cucugnanès.

Et dins les roudjeûrs du brêjis ki tourniyot, la k' dju wès l' grand du Blanc ki, du s' vicant,  
n'arètot nin du s' sôler et d' cheûre les puces a sa pôle fame –dj' ê vu la Catrinète dul Vôye du  
Bouyon ki coutchot al gragne avu les galants. Dj'ê vu l' Grand Dèdè ki s' fujot des mètes ou

bwès avu la pàrt des ôtes. Dj' ê vu la Babète du dzeu les têts ki glanot à chârpanant dins les damjèles. Dj' ê vu l' notêre, ki prustot ses sous a chéres pêléyes et haper les prés des pôves djans. Et la Jênê, ki mètôt d' l' êwe dins s' lacê. Et l' vî Flipe ki fjot aradjî les gamins et fwêre peû às gamines et la Zêlê ki rpassot tout l' viadje al fontin.ne. Et l' cinsî dou Vôye d' ôry ki n' savot lêchê ène boune a place. Et l' mon.nî du Grand Bî ki rmètôt pus d' grus ku d' farine et l'Batisse dou Champète ki djunot l' couchèt dvant du l' pèzer. Et dj' a pôros co dire jusk' a mîdi.

Et les djans choûtint, a s'ruchoûrbant l' front, blancs coume des mwârts, du rcouniche dins l' anfêr tout à lâdje, kî su grand-père, sa mère, sa tante, su cousin, su frère...

Vous v' rindèz bin compte, mes frères, ku ça n' put nin dèrer. Dj' ê tchêdje du vôs âmes, dju wête du v' sâver d' l' abîme èyû k' vous filèz, la tiêsse la prêmîre. Adon, vla cè k' dju va fwêre et nin pus târd ku dumwin. Gn è dul buzougne, vous v' z-a doutèz. Et fât aturprinde ça dins l'orde, fwêt' a fwêt.

Dumwin, dju cfêssrê les vîs et les vîyes : ç'est ç' ki pranrê l' mwinse du timps. Mârdi, ça srê les afants : dj' ârê co vite fwêt. Mèrcudi, les gamins et les gamines : ça pôrot trin.ner in pô d'pus. Djûdi, ou toûr des oumes et des djon.nes oumes : ène dère djoûrnéye. Vanrdi, ça srê l' toûr des fames et des coumères : ça c' est la grosse ovrâdje ; fâre chûr co bin passer la mitan dou l'chê. Dju lêche lu sam' di pou l' mon.nî : a loû tout seû, i fâre bin la matinéye.

Et si tchèkin vut bin mète du sin.ne, eh bin ! dîmadje ki vint, , tout l' monde srê eûreû d' sa smwin.ne ! Cand l' grin est bon, fât l' fâchê. Cand l' vin est rêchu, i fât l' bwâre. Cand l' lindje est niche, i fât l' laver, et a grande êwe co !!!

C'est toute la grâce ku dju v' s ouwête. Amen.

Et la smin.ne s' è passé coume on -z avot dit. Tourtous è fwêt sa grande buyée. Et dpwis çu smwin.ne la, lu viadje n' est pus sté a rcouniche, c'ére duvnu l' Paradis su tère ku l'Abé rêvot. Les vîs djint k'on nn' è câzé a des kilomètes alantôû.

Lu bon curé Martin, tout rapwêji, è rêvé kékes nutes pus târd, k'il montot les Crikwès avu tout l' viadje a pourcèssion, et k' i s' wèyot dja ou Paradis à mitan des cièrges et des boujies, a humant les nuwadjes d'ançans ki rêchint des ançanswârs ku les afants d' kûr balacint âtoû d' loû. Il avot arivé a ses fins... avu bin dou mâ....., i l' fât rcouniche.

Et vla l' istwâre du curé d' Cucugnan, ku l' vî Zidôre m' è raconté et ki la tnot, loû, du s' grand père, cand il ére gamin et k' il alint às vatches a Bourgueziê.

---

Rumètu a walon d' Bayamont pa Louwis BAIJOT pou les 75 ans d' sa seûr Ida, lu 18 du fèvrî 2002.